

# Gränzgänger



Fasnacht 2026

## Wyssi Hoor – schwarze Humor

Jedes Joor dr Cortege gniesse,  
Hampflewys Tonne vo Röppli verschiesse,  
Dr Waage all Joor ney dekoriert  
Vo obe abe intrigiert  
Und nit als Waggis no übligem Schema  
Sondern als Sujet-Massge mit bsunderem Thema  
Orange, Mimoose und Däfi verschängt  
Und nit an die eigene Problemlä dänggt.  
Am Zyschdig Zoobe zämme uff d Gass  
In dr Bernadette irem Blätzlibajass  
So hän mir Gränzgänger Fasnacht gmacht –  
Und jetz stoot vor em Joor e 8!

Mit schwarzem Humor und wysse Hoor  
Fyyre mir das Joor 80 Joor  
Wyssi Hoor sin e Läbenszaiche,  
drum gänn mir si all Joor zum Bleiche !  
80 Joor: quelle merveille histoire  
Et remarquable Repertoire!!!  
Aber hyt isch unser Sujet NOIR  
Noir isch uf Friieh-teutonisch: «schwarz»  
Schwarz wie nit verstüürt Ersparts.  
Und als Nachtschatte-Prominänz  
Lääbe mir vo dr Reminiszänz  
Und vo dr schwarze Transparänz  
Was mer als Jungi besser hänn welle  
Kasch hyt an einere Hand abzelle !  
Nyt isch hyt so wies als gsi isch  
Hyt isch nur wichtig, dass drby bisch !

Schwarz bruucht me fir mänggi Zwägg  
S ka maine «versteggt» oder «ewägg»  
So schwärzt me in politische Bricht  
Die haiggle Steelle und kain verlierts Gsicht !

Schwarz isch au im Liecht der Schatte  
Das nutze Politiker bi heisse Debatte  
Doch was alle sälte duet glinge:  
Ooni Hilf iber dr aige Schatte springe !

Was z Basel abgoot gseen mir kritisch  
Well fir vyl Baustelle heegschti Zyt isch.  
Faarsch mit em Schiff zur Kulturstadt am Rhy  
Isch d Rais scho in Hünige verby.  
Muesch an Land wo no nie bisch gsi  
Wäge dr Basler Bürokratie  
Vom Härzstück isch s Härz voll in de Hose  
Au dr Flughafebanhof kunnt nit, tschuld sin d Franzose  
Faart s Drämmli nimm dur d Innerstadt  
Findet dr Stadtlauf immer all Daag statt.  
Und fäält uf em Märtpplatz die grieni Wand  
Muesch halt zum schwarz faare uf Baselland.  
Dr schwarz Japan-Käfer isch e Schädling firs Land  
Sin die rote Juso-Wanze ächt mit däm verwandt ??!

80 Joor schwarze Humor  
Guet versteggt in wysse Hoor  
80 Joor, quel belle histoire  
Et quel remarkabel Repertoire !  
Mir gniesse d Fasnacht – das isch glaar,  
Und fyyre unsere Runde tout en NOIR !

*Vom Määntig znacht bis am Mittwoch demoorge kasch  
uff em Minschterplatz und em Kasärnen-Areal  
d'Ladärne-, d'Waage- und Requisiyten-Uustellig go aaluege!*

*Kumm doch au in unsere Glygge-Käller  
an dr Theaterstrooss 20*

[www.graenzgaenger.ch](http://www.graenzgaenger.ch)